

ARTICLES DE
LA PAIX.

303
3007



A PARIS,

Chez F. MOREL, & P. METTAYER,
Imprimeurs & Libraires ordi-
naires du Roy.

M. D C. XIV.

Avec Privilege de sa Majesté.

ARTICLES DE

LA PAIX.



A PARIS.

CH. MORISSE, P. METAYER

Imprimeurs, Libraires

Palais du Roy.

M. DCC. LXXV.

Paris.

ARTICLES ACCORDEZ
par le Duc de Vantadour, Pair
de France, & Lieutenant pour le
Roy au Gouvernement de Lan-
guedoc, les Sieurs de Thou, Jean-
nin, de Boissize, & de Bullion,
tous Conseillers au Conseil d'E-
stat, & Commissaires deputez par
sa Maiesté, en vertu du pouvoir
cy-apres transcrit, du 5. May der-
nier, à Monseigneur le Prince de
Condé, premier Prince du sang,
tant en son nom que des autres
Princes, Officiers de la Couronne
& Seigneurs qui l'ont assiste, soit
presens ou absens.

II

Que les Estats Generaux du Royaume
seront conuoquez & assemblez en la ville de

Sens à la maniere accoustumee, dans levingt-cinquiemesme du mois d'Aoust prochain, en laquelle les Deputez des trois Ordres qui y assisteront, pourrôt en toute liberté faire les propositions & remonstrances qu'ils iugeront en leurs consciences estre vtils pour le bien du Royaume, & le soulagement de ses subiets, afin que sur icelles sa Maiesté par l'aduis des Princes de son sang, autres Princes Officiers de la Couronne, & principaux Seigneurs de son Conseil, puisse faire quelques bōs Reglemens & Ordonnances, pour contenir vn chacun en deuoir, affermir les loix & Edicts faicts pour la conseruation de la tranquillité publique, & reformer en mieux les desordres qui peuuent donner quelque iuste occasion de plainte & de mescontentement à ses bons subiets.

II.

Q V A N T aux Mariages d'Espagne, la Royne Regente a escript à Monseigneur le Prince sur ce subiet lettres, dont il a receu contentemēt. Ainsi n'est besoing d'en faire mention en cest Article.

III.

L E s fortifications de la citadelle de Mezieres qui sont du costé de la ville, seront démantelees & ostees, & sur la supplication faicte par

305

Monſieur le Duc de Neuers , qu'il plaiſe à ſa-
diſte Maieſté luy ordonner aſſignation de
quelque ſomme de deniers pour luy ayder à
conſtruire vne maiſon, au lieu d'icelle qu'il a-
uoit en ladiſte ville de Mezieres , laquelle fut
demolie lors qu'on baſtit ladiſte Citadelle: a
eſté accordé qu'il ſera pourueu cy-apres d'aſ-
ſignation de la ſomme dont on conuiendra
auec luy.

IV.

LE fort de Blauet, dont on ſ'eſt faiſi depuis
ces derniers mouuemens , & que l'on a com-
mencé à rebastir & fortifier, ſera entierement
démoly, razé, & remis au meſme eſtat qu'il e-
ſtoit auparauant ladiſte faiſie & ſurpriſe, ſans
que cy-apres il y ait aucun Capitaine ny gar-
niſon , & le ſeront pareillement toutes autres
nouuelles fortifications faiſtes en la Prouin-
ce de Bretagne par qui que ce ſoit , pendant,
& à l'occaſion du preſent mouuement.

V.

ET pour faire ceſſer les ruines & oppreſſiōs
que le peuple ſouffre à l'occaſion des gens de
guerre, tant François qu'Eſtrangers qui ont
eſté leuez depuis le premier iour de Ianuier
dernier, & ſont à preſent eſpanchez en diuers
endroits de ce Royaume, ſoit pour ſa Maieſté
ou pour lediſt Sieur Prince, ſeront licentiez,

A iij

& lesdits Estrangers conduits hors le Royaume par Commissaires qui seront à ce deputez par sa Majesté, & ledict Sieur Prince, dans douze iours, apres la signature des presens articles. Et pour le regard des François, leur sera enjoint de se retirer en leurs maisons douze iours apres la signification qui leur en sera faite, à peine d'estre punis comme vagabons, & gens sans adueu.

VI.

SA Maieité voulant gratifier ledict Sieur Prince, a tres-volontiers accordé sur la priere & instance qu'il luy en a fait, & l'asseurance qu'il a de son affection & fidélité à son seruice, la Ville & Chasteau d'Amboise en depost, iusques apres la tenuë des Estats generaux, & pour la garde d'iceluy Chasteau, cent hommes de garnison.

VII.

MONSIEUR le Duc de Vendosme absët, rendant l'obeissance qui est deuë à sa Majesté, pour les causes contenuës au present traitté, elle veut & entéd qu'il soit remis en son Gouuernement, charges, honneurs, Capitaineries & Estats pour en ioüyr tout ainsi qu'il souloit faire cy-deuant, & que toutes interdictiõs faictes par lettres patentes ou autrement, soyent leuees & ostees par autres lettres pa-

tentes, adressees au mesme Parlement de Bretagne, en sorte qu'elles ne luy puissent estre d'aucun prejudice.

VIII.

ET sur ce qu'il a faict représenter auoir obtenu le consentement des Estats de Bretagne, pour leuer dans le pays l'argent necessaire pour l'entretienement de ses gardes, sadiete Majesté a trouué bon de cōfirmer & approuuer ce que lesdits Estats ont faict en ceste endroit.

IX.

COMME aussi ayant esgard à la supplication qui luy a esté faicte de la part de Mōsieur le Duc de Retz, de vouloir entretenir le nombre des gēs de guerre dans Machecou & Belle-Isle, selon qu'il est contenu au breuet octroyé par le feu Roy, elle a accordé de le faire pour quatre ans.

X.

L'ENTREPRISE faite sur Hennebon au preiudice du Sieur de Camore qui en est Capitaine & Gouverneur, sera reparee, & luy remis en sa charge comme il souloit estre auant ce mouuement.

XI.

TOUTES les garnisons mises dans les Villes & places du Royaume, à l'occasion du

present mouuement depuis le premier iour de Ianuier dernier, seront ostees fors & excepté cent hommes qui seront entretenus à Mezieres, iusques apres la tenuë des Estats generaux du Royaume, & deux cens hōmes pour le mesme temps en la ville de Soissons dont Monsieur le Duc de Mayenne est gouuerneur, & demeureront toutes les autres places au mesme Estat qu'elles estoient auparauant.

XII.

LET TRES patentes seront expediees & l'adresse d'icelles faicte à tous les Parlements pour les verifier, par lesquelles sa Majesté declarera auoir esté bien & deuëment informee, ledit sieur Prince, & les autres Princes Officiers de la Couronne de quelque qualité & condition qu'ils soient & qui l'ont suiuy & assisté en ce mouuement n'auoir eu aucune mauuaise intention contre son seruice, avec les clauses necessaires pour leur seuretez & descharges, & empescher qu'ils ne puisent estre poursuiuis & recherchez à ceste occasion à l'aduenir, ensemble pour les reestabliir en leurs charges, Estats & dignitez pour en iouyr tout ainsi qu'ils souloient faire auant ce mouuement.

XIII.

ET pareillement sera escrit par sa Majesté
aux

aux Princes, Estats & Republiques alliez de ceste Courõne, & personnes de qualité enuoyees expres vers eux pour leur faire entendre ce qu'elle a recogneu de l'innocence & bonne intention desdits Sieurs Princes & Officiers de la Couronne & Seigneurs qui les ont assistez.

XIV.

ACCORDE encor sa Maiefté pour tous les frais que lesdits sieurs Princes Officiers de la Couronne & Seigneurs pourroient auoir fait à l'occasion de ce mouuement, de donner comptant audit Sieur Prince de Condé la somme de quatre cens cinquante mil liures, à departir par luy entr'eux ainsi que bon luy semblera.

XV.

MOYENNANT les choses susdites qui autrement n'eussent esté consenties & accordees par sa Maiefté, se sont lesdits sieurs Princes Officiers de la Couronne & Seigneurs departis de toute ligue & association avec qui que ce soit, tant dedans que dehors ce Royaume, avec promesse de n'en iamais faire à l'aduenir.

XVI.

ACCORDE aussi sa Maiefté en consideration des grands & signalez seruices faits à ceste

Couronne, tant par les predecesseurs dudit
sieur Duc de Neuers que par luy mesme, de
luy donner vn breuet & toutes autres expé-
ditions necessaires pour la suruiuance du gou-
uernement de Champagne au nom de son fils
aisné.

XVII.

FAICT & arresté à saincte Manchould le
quinziesme iour de May, mil six cens qua-
torze.

Signé HENRY DE BOVRBON,
VANTADOVR, CHARLES DE
GONZAGVE DE CLEVES,
HENRY D'ORLEANS, HEN-
RY DE LORRAINE, HENRY
DE LA TOVR, AV. DE THOV,
P. IEANNIN, I. DE THVMERY,
BVLLION, HENRY DE LV-
XEMBOVRG, TAVANES.

L OVIS PAR LA GRACE DE DIEV
ROY DE FRANCE ET DE NAVARRE.
A nostre cher & bien amé Cousin le Duc de Vantadour, Pair de France, nostre Lieutenant General au Gouvernement de Languedoc, & à nos amez & feaulx Conseillers en nostre Conseil d'Etat, les sieurs De Thou, Jeantin, De Boissize, & De Bulion, salut. COMME pour resouldre les Propositions & Ouvertures qui ont esté cy-devant faictes pour faire cesser les mouuemens qui se preparoient en ce Royaume, Nous vous avons enuoyez en nostre ville de Soissons, où estoit lors nostre tres-cher Cousin le Prince de Condé: Et estant besoin à present pour convenir avec nostre dit Cousin, des moyens propres à l'effet de nostre intention vous authorizer de nos Lettres de Commission à ce necessaires. A CES CAUSES, à plain confians de vostre affection, fidelité, suffisance, & bonne conduite, Nous vous avons par l'advis de la Royne Regente nostre tres-honnoree Dame & Mere, des Princes Officiers de nostre Couronne, & Principaux Seigneurs de nostre Conseil estants prez de nous, commis, ordonnez, & deputez: commettons, ordonnons & deputons par ces presentes, Pour vous transporter derechef vers nostredict Cousin le Prince de Con-

dé, luy declarer nos volontez sur l'accommodement
 desdits mouuements, en conuenir, traicter, cōclurre
 & passer en nostre nom, tant pour luy, que pour
 les Princes Officiers de la Couronne, Seigneurs,
 & tous autres qui l'ont assisié & suiny, Les Ar-
 ticles & conditions que vous iugerez raisonna-
 bles & utiles à nostre seruice, les signer & en
 promettre l'exccution de nostre part, & generale-
 ment faire en ce que dessus circonstances & de-
 pendances, tout ce que nous mesmes ferions &
 faire pourrions si presents & en personne y é-
 stions: iacoit que le cas requist Mandement plus
 special que n'est contenu en cesdictes presentes.
 Promettans en foy & parolle de Roy auoir agrea-
 ble, tenir ferme & stable à tousiours tout ce que
 par vous sera faict, traicté, conclu, geré, promis
 & negocié pour ce regard, & d'en donner & fai-
 re expedier les Declarations necessaires. De ce fai-
 re vous auons & aux trois de vous en l'absence,
 maladie, ou empeschement des autres, donné &
 donnons plain pouuoir, puissance & autorité.
 Car tel est Nostre plaisir. **DONNE** à Paris,
 le cinquiesme iour de May, l'an de grace mil six
 cens quatorze, Et de nostre Regne le quatriesme,
 Ainsi signé, **LOVIS**. Et plus bas par le Roy, la
 Royne Regente (a Mere presente, **DE LOMENIE**,
 Deuëment scelee du grand seel en cire iaulne à sim-
 ple queue.



